

## Edizioni

- letto 505 volte

## Wallensköld

### I.

Tuit mi desir et tuit mi grief torment  
viennent de la ou sont tuit mi pensé.  
Grant poor ai, pour ce que toute gent  
qui ont veü son gent cors accesmé  
sont si vers li de bone volenté.  
Nès Deus l'aime, gel sai a esciënt;  
grant merveille est, quant il s'en suesfre tant.

### II.

Touz esbahiz m'obli en merveillant  
ou Deus trouva si estrange biauté;  
quant il la mist ça jus entre la gent,  
mult nous en fist grant debounereté.  
Trestout le mont en a enluminé,  
qu'en sa valor sont tuit li bien si grant;  
nus ne la voit ne vous en die autant.

### III.

Bone aventure aviengne fol espoir,  
qui mainz amanz fet vivre et resjoir!  
desperance fet languir et doloir,  
et mes fous cuers me fet cuidier guerir;  
s'il fust sages, il me feïst morir.  
Pour ce fet bon de la folie avoir,  
qu'en trop grant sens puet il bien mescheoir.

### IV.

Qui la voldroit souvent ramentervoir,  
ja n'avroit mal ne l'esteüst guerir,  
car ele fet trestoz ceus melz valoir  
cui ele veut belement acoillir.  
Deus! Tant me fu grief de li departir!  
Amors, merci! fetes li a savoir:  
cuers qui n'ainme ne puet grant joie avoir.

**V.**

Souviengne vous, dame, du douz acueil  
qui ja fu fez par si grant desirrier,  
que n'orent pas tant de pouoir mi oeil  
que je vers vous les osasse lancier;  
de ma bouche ne vos osai prier,  
ne poi dire, dame, ce que je vueil;  
tant fui coarz, las, chetis! Q'or m'en dueil.

**VI.**

Dame, se je vos puis mès aresnier,  
je parlerai mult melz que je ne sueil,  
s'Amors me let, qui trop me maine orgueil.

**VII.**

Chanson, va t'en droit a Raoul noncier  
qu'il serve Amors et face bel acueil  
et chant souvent com oiselez en brueil.

- letto 389 volte

Credits | Contatti | © Sapienza Università di Roma - Piazzale Aldo Moro 5, 00185 Roma T (+39) 06 49911  
CF 80209930587 PI 02133771002

---

**Source URL:** <https://letteraturaeuropaea.let.uniroma1.it/?q=laboratorio/edizioni-459>